

ALIBANGBANG

Gardeopatra Quijano

Kang CELING RODRIGUEZ sa *Sugbu*

Ania ka na sa akong mga kamut;
Hugton ko ang akong pagkupot kanimo,
Dili ko ikaw hiktan niining lanot
Kay unya talikdan mo hinuon ako.

Tan-aw binuhat nga maluming ug matahum,
Nganong maaanindot ka man gayud kaayo?
Makatugkad ba ako nganong mopahiyum
Ang mga bata kon makakita kanimo?

Didto ko ikaw hidakpi sa tanaman,
Kay nagsuyop sa duga sa mga bulak;
Milugnot ka kay molupad sa kahanginan,
Apan gisignit ko ikaw nga nagahilak.

Karon aniaikaw gikuptan nako,
Alibangbang nindot ug makabibihag,
Sihag ug hamis ang imung mga pako,
Tug-ani ako: puti ba nag imung kalag?

Gikan sa pagkamang sa yutang abugon
Hangtud ning matahum mo karon panagway,
May nakita ba ikaw nga talagsaon
Nga makahatag kanimo ug kalipay?